

Uunga

Allanguutissatut siunnersuut

**Umiarsualivimmiinnermut akileraarutit pillugit Inatsisartut inatsisaata
allangortinnera pillugu Inatsisartut inatsisissaannut siunnersuut**
(Umiarsuarni takornarianik angallassisuni ilaasut akileraarutaannik atuutilersitseqqinneq)

Pingajussaaneerinninnermut Naalakkersuisunit saqqummiunneqartoq

§ 1-imut

1. § 1, nr. 4-p ataani § 1b siunnersuutigineqartoq, ima oqaasertalerneqassaaq:

” **§ 1b.** Umiarsuit takornariartaatit tamarmik § 1a, taamaattoq § 2 naapertorlugu umiarsualivimmiinnermut akileraarummut tapitut ilaasut tamarmik amerlassusaat malillugit nunalinerit tamaasa ataasiarlutik ilaasunut akitsuummumut akiliisassapput. Ilaasunut akitsuut ilaasumut ataatsimut 50 kr.-nik annertussuseqarpoq.

Imm. 2. Ukiumut aningaasanut inatsiseqarfiusumut 2025-mut taassumalu kingorna umiarsuarnut takornariartaatinut ilaasunut akiliut aningaasanut inatsimmi oqaasertaliussakkut allangortinneqarsinnaavoq.”

§ 2-mut

2. § 2 ima oqaasertalerneqassaaq:

”§ 2

Inatsisartut inatsisaat ulloq 1. december 2023 atuutilissaaq.

Imm. 2. § 1, nr. 1-12, ulloq 1. januar 2024 atuutilissapput.”

Siunnersuummut nassuiaatit

Nassuiaatit nalinginnaasut

Aningaasaqarnermut Akileraartarnermullu Ataatsimiititaliap isumaqatigiittup siunnersuutip akuersiissutigineqarnissaa inassutigaa, Naalakkersuisulli pingajussaaneerinninnermi allannguutissatut siunnersuummik saqqummiussinissaannik kaammattorlugit.

Allannguutissatut siunnersuutip umiarsuarnut takornariartaatinut ilaasunut akileraarutip annertussusaata ingerlaavartumik eqaatsumillu nalimmassarneqarsinnaanera qularnaassavaa.

Allannguutissatut siunnersuutip taassuma siunissami akileraarutip annertussusaata ingerlaavartumik nalimmassartarnissaanik kissaateqarneq qularnaarpaa.

Taamattaq inatsilerinermi teknikikkut tunngaveqartumik inatsisip atuutilersinneqarnissaata siuartinneqarnissaa siunnersuutigineqarpoq, taamaalilluni ulloq 1. december 2023-iuinnartoq inatsit allangortitaq toqqammavigalugu nalunaarummik saqqummiussisoqarsinnaaqqullugu.

Akileraarutinut akiliutinullu akiliisitsisarnerit suli ulloq 1. januar 2024 aallarnerfigalugu atuutilernissaat siunnersuutigineqarpoq.

Allannguutissatut siunnersuummi aalajangersakkanut ataasiakkaanut nassuiaatit*§ 1-mut*

Nr. 1-mut

Siunnersuummi saqqummiunneqartumi umiarsuarnut takornariartaatinut ilaasumut akileraarut ilaasumut ataatsimut 50 kr-iusoq takuneqarsinnaavoq. Akileraarut nunalilernit tamaasa akiligassanngortinneqartassaaq.

Allannguutissatut siunnersuutikkut aningaasanut inatsimmut oqaasertanik suliaqarnermut atatillugu eqaannerusumik ukiumoortumik umiarsuarnut takornariartaatinut ilaasunut akileraarusiussap annertussusaanik nalimmassaasarnissap atulersinneqarnissaa siunnersuutigineqarpoq. Akileraarusiussap ingerlaavartumik nalimmassarsinnaaneranut periarfissakkut, akileraarusiussap ajornannginnerusumik umiarsuarnik takornariartaatinik ingerlatsisuni ineriartornermut nalimmassarneqarsinnaanera ajornannginnerulersinneqassaaq.

Ukioq aningaasanut inatsiseqarfiusoq 2025 aallarnerfigalugu umiarsuarnut takornariartaatinut ilaasunut akileraarutip annertussusaa, aningaasanut inatsimmi oqaasertaliussatigut allanngortinneqarsinnaalissaaq. Akileraarutip annertussusaata allanngortinneqarnera pillugu oqaasertaliussamik ivertitsisoqartinnagu, akileraarummik ilaasumut ataatsimut 50 kr-nik annertussusiliussatut aalajangersarneqartoq atuutissaaq.

§ 2-mut

Nr. 2-mut

Siunnersuummi saqqummiunneqartumi inatsit ulloq 1. januar 2024 atuutilissasoq takuneqarsinnaavoq.

Allanguutissatut siunnersuutitut saqqummiussakkut inatsisip atuutilerfissaa ulloq 1. januar 2024-mit ulloq 1. december 2023-mut qaammammik ataatsimik siuartinneqassasoq siunnersuutigineqarpoq, taamaattoq akileraarutininut akiligassanullu akiliisitsinerit aatsaat ulloq 1. januar 2024 atuutilernissaat suli pissaaq.

Siuartitsinissamik siunnersuuteqarneq inatsisilerineri teknikumut tunngasuuvoq. Avatangiisinut iluarsaassisarnernullu kommuninut akiliutit ulloq 1. januar 2024 atuutilernissaat angumerineqassappat, tamanna sioqqullugu kommunit piffinnik akiliutissallu annertussusaannik akileraaruseriffimmut nalunaarsimanissaat piumasaqaataavoq. Inatsisip atuutilerfissaanik qaammammik ataatsimik siuartitsinikkut, umiarsualivimmiinnermi akileraarummik umiarsuarnullu takornariartaatinut ilaasunut akileraarummik nutartikkamik ulloq 1. december 2023, immikkoortumi allaffissornikkut najoqqutassiaasumi, saqqummiussisinnaaneq pisinnaangortinneqarpoq.

Tassungaa atillugu avatangiisinut iluarsartuussisarnermullu akiliutitut siunnersuutigineqartukkut, kommunit piffinnik akiliuteqarfigineqartussanik toqqaanissaat siunnersuutigineqarpoq. Kommuniittaaq akiliutissat annertussusaannik aalajangersaasinnaanermik piginnaatinneqarnissaat siunnersuutigineqarpoq, taamaattoq akiliut nunalineri ataatsimi ilaasumut ataatsimut annerpaamik 50 kr-nik annertussuseqarsinnaavoq.

Siuartitsinissamik siunnersuut taamaalilluni taamaallaat inatsisilerineri teknikumik toqqammaveqarpoq, taamaalillunilu akitsuutininut akiliutinullu akiliutissatut siunnersuutigineqartut atuutilerfissaanik siuartitsissanani.